

ԳԼՈՒԽ Ա.

ՊԱՏԵՐԱԶՄԸ ԵՒ ՀԱՅ ԺՈՂՈՎՈՒՐԴԸ

Ինչպէս կայծակը անամպ երկնքից, 1914 թւի յուլիսին, պայթեց համաշխարհային պատերազմը: Ազգեր ելան ազգերի դէմ: Աշխարհ իրար խառնեց: Եւ քաղաքակրթութեան զարգացումն ու մարդկութեան յառաջագիմութիւնը կանգ առաւ երկար ժամանակով:

Պատերազմը ահաւոր փորձութիւն եղաւ ամբողջ երկրագնդի, բայց, մանաւանդ, հայ ժողովրդի համար: Նա բռնկեց այն պահուն, երբ հայ-թրքական յարաբերութիւնների լարումը հասել էր ծայրայեղ աստիճանի, երբ հայը թիւրքիայում նորից դարձել էր «խային» ազգ, «պետական դաւաճան», «կոյր գործիք մեծ պետութիւնների ձեռքին»...

Նոր էր ստորագրւել բարենորոգումների ծրագիրը: Օսմանեան սահմանադրութեան յաջորդող հայ-թրքական համերաշխութեան մեղրամիսը կարճ տևեց: Կիլիկիայի ջարդը, ներքին ճնշումները, կառավարութեան կասկածոտ վերաբերումը դէպի հայ տարրը, հողային հայակործան քաղաքականութիւնը Արևելեան վիլայէթներում, թիւրք ազգայնամոլութեան յարաճուն զարգացումը Իթթիհատի ծոցում — այս և ուրիշ բազմաթիւ պատճառներ վերջնապէս համոզեցին հայերին, որ առանց արտաքին օգնութեան, միայն թիւրքական միջոցներով անկարելի է ձեռք բերել կեանքի բարելաւում: Եւ նորից ամենքի հայեացքը ուղղւեց դուրս՝ դէպի «մարդասէր Եւրոպան»:

Սահմանադրութեան օրերին ամբողջ թիւրքահայութիւնը, չնչին բացառութեամբ, կանգնել էր օսմանեան պետականութեան հողի վրա: Հ. Յ. Դաշնակցութիւնը, հայ ժողովրդի մեծագոյն կուսակցութիւնը՝ գործակցելով Իթթիհատի հետ՝ ձգտում էր իրականացնել համապետական նպատակներ: Երեսուն տարիների յեղափոխական մաքսոումներից յետոյ, հայը անվերապահ կերպով դառնում էր օսմանեան քաղաքացի, հաւատարիմ տարր օսմանեան «վերածննդ հայրենիքի»: Ի՞նչ աւելի յարմար առիթ թիւրք գործիչների համար՝ օգտագործելու հայ ժողովրդի այս ինքնաբուխ գզացմունքները:

Մարտեան յետաշրջական օրերին հայ ժողովուրդը, մի մարդու պէս, ոտքի կանգնեց՝ պաշտպանելու համար հասարակաց հայրենիքն ու նոր ուժ-